

**Ն. Ս. Օ. Տ. Տ. ՊԱՐԵԳԻՆ Բ.
ԱՄԵՆԱՅՆ ՎՅՈՑ ԿԱԹՈՂԻԿՈՍԻ ՕՐՀՆՈՒԹՅԱՆ ԽՈՍՔԸ
ՈՌԻՍԱՍՏԱՆԻ ԵՎ ՆՈՐ ՆԱԽԻՋԵՎԱՆԻ ՎՅՈՑ ԹԵՍԻ 300-ԱՄՅԱԿԻՆ ՆՎԻՐՎԱԾ
ԳԻՏԱԺՈՂՈՎԻ ՄԱՍՆԱԿԻՑՆԵՐԻՆ**

(15-16 սեպտեմբերի 2017 թ., Մոսկվա)

Գերաշնորհ Սրբազան՝ Առաջնորդ Ռուսաստանի եւ Նոր Նախիջևանի Հայոց Թեմի,

Հոգեշնորհ եւ արժանապատիվ հայրեր,

Գիտաժողովի մեծարգո՝ մասնակիցներ,

Հայրապետական Մեր ողջույնը եւ հայոց հոգեւոր կենտրոն Մայր Աթոռ Սուրբ Էջմիածնի օրհնությունն ենք բերում Ռուսաստանի եւ Նոր Նախիջևանի Հայոց Թեմի ստեղծման 300-ամյակին նվիրված գիտաժողովի կազմակերպիչներին ու մասնակիցներին:

Գոհունակությամբ ենք անդրադառնում, որ մեր ժողովրդի կյանքում անգնահատելի դերակատարություն ունեցած Առաքելական մեր Սուրբ Եկեղեցու Ռուսաստանի եւ Նոր Նախիջևանի պատմական Թեմը բոլորել է իր հոբելյանական երրորդ հարյուրամյակը: Ստեղծվելով մեր Եկեղեցու եւ ժողովրդի համար պատմականորեն ու քաղաքականապես բարդ ու դժվարին պայմաններում՝ Տիրախնամ Թեմը հարաճուն մասնակցություն է ունեցել Հայ Եկեղեցու առաքելությանը՝ հոգեւոր խնամքի ներքո համախմբելով ու պահպանելով ռուսաստանաբնակ մեր ժողովրդին: Թեմի գործունեությունը բազմարդյուն է եղել մեր ազգային-եկեղեցական, գիտական, գրական ու մշակութային կյանքում: Մեր ժողովրդի հավատավոր եւ ազգասեր զավակների ջանքերով այստեղ կառուցվել են հայկական եկեղեցիներ, ստեղծվել մեր ազգային դպրության ու լուսավորության, գիտության ու մշակույթի նշանավոր կենտրոններ ու հաստատություններ, որոնք վառ են պահել հավատքը մեր ժողովրդի, սերը առ հայրենին ու ազգս հայոց եւ տեսլականը հայրենի պետականության վերակերտման՝ աջակցության հույսեր կապելով նաեւ Ռուսաց բարեպաշտ պետության հետ: Ռուսիո օրհնյալ տերության հովանու ներքո ապրող մեր ժողովրդի զավակները, հասնելով մեծ հաջողությունների, նաեւ իրենց բարի ավանդն են բերել երկրի պետական, հասարակական ու տնտեսական

կյանքին, ռազմական փառքին, գիտություն ու մշակույթի զարգացմանն ու առաջընթացին՝ զորացնելով եղբայրական սերը հավատակից հայ եւ ռուս ժողովուրդներին:

Երեքհարյուրամյա պատկառելի պատմության հետագծին նայելով՝ այսօր էլ ուրախությամբ ենք արձանագրում Ռուսաստանի եւ Նոր Նախիջևանի Հայոց թեմի եկեղեցաշեն ու ազգանպաստ առաքելության զարգացումը: Զորավոր հիմքի վրա դրված ավանդությանը նոր շունչ հաղորդելով՝ նվիրյալ հոգեւոր սպասավորներն ու բարեպաշտ հայորդիները, գլխավորությամբ բարեխնամ Առաջնորդ Տ. Եզրաս արքեպիսկոպոս Ներսիսյանի, շարունակում են արդյունավորել Ռուսիո օրհնյալ երկրում մեր Սուրբ Եկեղեցու առաքելությունը: Նորանոր ձեռքբերումներով ու հաջողություններով է պսակվում մեր ժողովրդին հավատքի ու փրկության ճանապարհով առաջնորդելու, Մայր Եկեղեցու շուրջ համախմբված մեր հավատացելոց հոգեւոր եւ հայեցի դաստիարակությունն ու կրթությունը կենսունակ պահելու սպասավորությունը: Այդ սրբազան առաքելության վերարժեւորման մի կարեւոր փաստ է նաեւ հոբելյանական այս գիտաժողովը, որը լավագույն առիթ է ամենքիս համար՝ նոր ժամանակների հրամայականներին ընդառաջ վերանայելու եւ վերարժեւորելու թեմում Հայոց Եկեղեցու գործունեության անցյալի ձեռքբերումները եւ ապագայի տեսլականները:

Սիրելիներ՛ր, վերստին Մեր օրհնությունն ենք բերում ձեզ եւ այս համագումարի կազմակերպիչներին՝ մաղթելով երկնապարզեւ հաջողություններ նվիրական ծառայության մեջ:

Աղոթում ենք առ Տերն Ամենակալ Ռուսաստանի եւ Նոր Նախիջևանի Հայոց թեմի առաքելության մշտանորոգ արդյունավորման, հայ եւ ռուս եղբայր ժողովուրդների բարեկամության ամրապնդման, Հայաստանի Հանրապետության եւ Ռուսաստանի Դաշնության փոխհարաբերությունների ու գործակցության արգասավորման, այլեւ մեր հայրենիքի խաղաղության, Ռուսիո հայ համայնքի եւ աշխարհասփյուռ հայության առաջընթացի ու լուսավոր ապագայի համար: Թող Աստված ամենախնամ Իր Սուրբ Աջով օրհնի ազգիս զավակների եկեղեցանվեր, հայրենաշեն ու ազգանպաստ բոլոր բարի ջանքերն ու գործերը. ամեն:

